

TESALÓNICAMO ITE CRISTONA HNOTINOMO PABLO IE EMODOMO ORETAGA RABE

Uaiduacino

1 ¹⁻²Tesalónicamo ite creyentiai, omoimo cartana cueticue. Pablocicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediiaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uiñocana omoi jaillana jitaídicaí. Iaimaiai omoi uri itatajana omoi uiñocana jaillana jiai jitaídicaí.

Cristo dane abido bia, naimiena iñoñedinona duere finoite

³Jusiñamuimo cai jiiia, omoi facaina naimiemo iobillacinona fecacabidicaí. Cristona iñocana raise jaidomoi. Coniniri isiruicana raise jaidomoi. ⁴Ie jira marena omoi illana jiaie creyentiai illanomo llocana uiticaí. Duere sefuidomoi; iadedi danomo abido jaiñedomoi. Cristona iñocana jaidomoi. Iena llocana uiticaí. ⁵Jiainomona birui duere sefuidomoi; ia iñocana jaidomoi. Iemona Jusiñamui omoi facaina illana uiñoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

⁶Jusiñamui omoína duere finodínona ico duere finoite. Omoi facaina ibana oite. Iese naimie finoa, naimiemona

mare. ⁷Cai Nama Jesús abido bia, duere sefuillamona jilloiticaí. Monamona ie siño jaienisai diga biite. Irai boua isoi ana biitimaci. ⁸Jusiñamuina iñoñedinona diese duere finoitimaci. Cai Nama Jesús rafuena naimaci iñoñena jira, naimacina duere finoitimaci. ⁹Iñoñena jira, jaca faifitimaci. Jaca llegi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰Cristo bille facaise naimiemo iobillacinona fecaiticaí. Naimieri nana naimiena iñotino rajjicaitimaci. Omoimo cai lloga rafuena omoi jai iñua jira, iese iitomoi.

¹¹Ie jira omoi facaina jicabidicaí. Naimie jitailla isoi, omoína naimie marena itatajana jiidicaí. Omoína naimie fetuamona, ie uaido mare rafuena finocana omoi jaillana jiidicaí. Ie uaido naimiena iñocana omoi jaillana jiidicaí. ¹²Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caina duenaillamona iese iiticaí.

Jesucristo abido bille rafue

2 ¹Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue. ²“Cai Nama jai abido bite” raillana omoi cacaia, raire jarire iñeno.

Rucaicueriñeno. “Jusiñamui Joreño iena cuemo jai llotte” damie raia, iena iinoñeno. Nie lloraima iena lloia, iena iinoñeno. “Pablomona cue feiñoa carta iena llotte” damie raia, iena iinoñeno. ³Naie isoide rafue diga omoína jiaíno jifueiacania, iena iinoñeno. Cai Nama nia biñena facaise, eo ailluena comini naimiëna enoitimaci. Iemei Taife dinena damie biite. Ja muidommo naimie faifite; ⁴iadedi nano jiaie rafuena finoite. Taife dinena naimie billanona, jirarai baifemmo iacanite. Jerusalémo Jusiñamui jofommo illanona, “Jusiñamuidicue” raite. ⁵Omoi dine navui cue ia, bie rafuena omoímo lloticue. ⁶Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. ⁷Taife marañede rafuena birui bainino finotate. Jusiñamui Joreño naimiëna marañede rafuena birui marefodo finuana rairuide. Jusiñamui Joreño naimie rairuiñena mei, ⁸Taife dinena marañedimie biite; ia cai Nama Jesús abido ebire bia, firaiñuamona naimiëna meineite. ⁹Cai Nama Jesús nia abido biñenia, comini jifuellena, Taife uaido bie marañedimiedi diga siño rafuena finoite. ¹⁰Cominina eo marañedicinodo jifueite. Naie comini ico faifitimaci. Jusiñamui ie uanaicinona naimiaci iinoñena jira, jilloiacañeitimaci. ¹¹Ie jira Jusiñamui naimacina tainocinona iinotaite. ¹²Jusiñamui ie uanaicinona naimiaci iinoñena jira, marañede rafuena naimiaci ebiruilla jira, Jusiñamui naimacina duere finoite.

Jusiñamui omoína jai fetode

¹³Jusiñamuina iinoñedino isoi Jusiñamui omoína duere finoñeite. Naimie omoína jai fetua jira, naimiemo iobillacinona jaca fecacabidicai. Omoi jilloillena, nano dofoconi omoína fetode. Ie Joreño uaido naimie

jitaillacinona omoi finollena, naimie uanaicinona omoi iinuamona, omoína fetode. ¹⁴Ie rafuena cai lluumona, Jusiñamui omoína jai jillotate. Iemona cai Nama Jesucristo ebirede illanomo jaca iitomoi. ¹⁵Ie jira, Cristona iinocana omoi jai. Cai llogacinodo omoi jai. Iena caimona jai cacadomoi. Cai cartamona iena jiaí cacadomoi. ¹⁶Omoi facaina cai Nama Jesucristommo, cai Moo Jusiñamuimo, jiaicabidicai. Naimie caina isiruite. Cai comeciaina jaca ocuiñotade. Caina duenailamona naimie lloga rafue suillemo raise ocuiridicai. ¹⁷Naimie omoi comeciaina nia ocuiñotallena jiidicai. Nie isoide rafuena omoi finoia, naie rafue omoi marena finollena jiidicai. Buena omoi ñaia, omoi marena ñaillena jiaí jiidicai.

Cai facaina omoi jiaiana jitaídicaí

3 ¹Daje rafue nia lloiacadicue. Cai facaina omoi jiaiana jitaídicaí. Cai Nama rafue llocana jaillana jitaídicaí. Omoi iinua isoi, jiaíno iinuana jiaí jitaídicaí. ²Marañedinomona cai jillobillena, omoi jiaiana jitaídicaí. Ailluena comini Cristona iinoñedimiaci; ³ia cai Nama jaca iinogamie. Omoi comeciaina ocuiñotaite. Marañedicinomona omoína eenoite. ⁴Cristommo cai duilla jira, cai llogacinona omoi jai iinuana jai uiñoticaí. Iena nia iinoitomoi. ⁵Cai Nama Jesús omoína Jusiñamui omoína isiruillana uiñotajana jitaídicaí. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuimo omoi facaina jiaíticue.

Maijiuillasa

⁶Cai Nama Jesucristo jitailla jira, jiaie rafuena nia lloiticue. Jiaie croyente maijiacañenia, naimie diga eo nabairiñeno. Iena navui omoímo

lloticue; ia damierie iese ia, naimaci diga eo nabairiñeno. ⁷Caimona fueo. Navui omoi motomo iticai; ia cai ucube ollena, jaca maijdicai. ⁸Guillena ibaño guñedicai; ia nagarui eo maijdicai, omoína duere cai finoñellena. ⁹Cristo facaina cai maijia jira, omoimona ra jamai cai jicallena, caimo uai ite; iadedi caimona omoi fueollena iese jicañedicai. Omoi ra ollena, omoi maijiana jitaidicai. ¹⁰Navui omoi motomo cai illa facaise lloticai: “Bu maijiacaiñenia, guñena”. ¹¹Omoi motomo damierie jai maijiñenana jai fididicai. Maijiñeno jai itimaci. ¹²Cai Nama Jesucristomo cai duilla jira, naie isoidinomo maijillena lloticai. Uainino maijiamona ucube naimaci uana

jitaidicai. ¹³Cue amatiai, nie isoide mare rafuena finollena sefuiruiñeno. ¹⁴Cue jai cuega cartamo ite rafuena bu iñoñenia, nana creyentiaina naimiena uiñota. Naimie meidallena, naimie diga nabairiñeno. ¹⁵Naimiena enoiño; ia creyentena naimie nia illamona, naimiena fecuise llofue.

Fuiduacino

¹⁶Cai Nama omoi jaca uri itatajana jitaidicai. Naimie omoi diga jaca iite. ¹⁷Cuena canollena, naimiemo cue llua isoi, jiaimie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablocue. ¹⁸Cai Nama Jesucristo nana omoina duenaillasa. Mai. Macaibaite.